

## **Sikûn Tesarõn** **Pawre kot Tesarõn kamã Jejus kôt** **kwÿjê hwÿr wam kagà nẽ mẽn̄h kôt** **hõ kagà nẽ mẽn̄h**

Pawre na pre kagàja nhĩpêx nẽ ma Tesarõn kamã Jejus kôt hkwÿjê hwÿr kumẽ. Na pre hte Tesarõn kamã mẽ kãm Jejus ã mẽ hkurê xwÿnhjaja Jejus ã tanhmã mẽ homnuj to nhũm mẽ amnhĩ xà htÿx kamã hamak o pa. Hãmri nhũm Pawre mẽ harẽnh ma nẽ kagàja nhĩpêx nẽ mẽ hwÿr kumẽ. Nẽ kamã mẽ kãm mẽ hamaxpêr o hihtÿx. Nẽ mẽ kot arĩ Tĩrtũm kôt amnhĩ nhĩpêx mex o pa nẽ hamaxpêr kôt hamaxpêr o pa hã mẽ kãm karõ. Nẽ nhÿrmã Jejus akupÿn kaxkwa rũm mẽ pahpê hkrajê hwÿr wrÿk nẽ pika ho hapêx par ã mẽ kãm harẽ. Æ na pre Pawre mẽ kãm kagàja kamã mẽ kãm ujarẽnh anẽ. Nẽ mẽ kãm:

<sup>1</sup> Pa Tesarõn nhõ xwÿnh kot Tĩrtũm kapêr mar kaxyw axpên wÿr mẽ apikuprõnh xwÿnhjaja? Xà mẽ amex na ka mẽ apa? Ixpê Pawre na pa axte mẽ awÿr kagà nhĩpêx nẽ kumẽ. Siras mẽ Ximotre mẽ pa mẽ awÿr kumẽ. Nà mẽ pahpê Mẽpanhĩpêêxà maati Tĩrtũm mẽ Kra Jejus Kris kwÿ na pu mẽ.

<sup>2</sup> Jakamã na pa htem mẽ ato wa hwÿr rãhã ho ri ixpa. Wa kot mẽ akutã nojarêt rãhã ka mẽ ajamakêtkati nẽ apa kaxyw. Nẽ mẽmoj to mẽ akutã wa nojarêt rãhã ho pa kaxyw.

*Tīrtūm kot nhỹrmã hkrajê nhĩpêx kati xwỳnhjê  
homnuj tỳx ã harēnh*

*Wam Pêtre 4.12-19*

<sup>3</sup> Nê na ka htem amnhĩ kaxyw Tīrtūm mã aja-maxpêr tỳx mex o ri apa. Nê axpên kutã anojarêt rãhã nê. Na pa htem ã mẽ ate amnhĩ nhĩpêx anhỹrja mã ijamaxpêr nê mẽ anhỹ hã ixkĩnh nê Tīrtūm mã mẽ anhỹ hã ixkĩnh ã amnhĩ jarê. <sup>4</sup> Nê nhỹhỹm ixpa nê nhỹri krĩm agjê nê kamã Tīrtūm kôt mẽ pahkwỳjê mã mẽ ato amỹra nê mẽ kãm:

—E pa mẽ amã Tesarōn kamã Kris kwỳjê jarê ka mẽ inhma. Nà mẽ õ krĩ kamã mẽ hkwỳjaja na htem Kris ã mẽ hipêx kati ho pa nhũm htem amnhĩ xà htỳx kamã hamak pê mex kêt nê pa. Tã nom tee ri amnhĩ kukamã hamaxpêr o Jejus kaga hkêt nê. Na htem arĩ hkôt amnhĩ nhĩpêx mex rãhã ho pa. Anê.

<sup>5</sup> ã mẽ ate mẽ kutã amnhĩ nhĩpêx anhỹr o apaja na hte Tīrtūm hã mẽ apumu nê hkĩnh nê pa. Nê mẽ akukamã hamaxpêr o:

—Mẽ kot Ixkra Jejus ã tanhmã mẽ hipêx to ho pa htã ãm hãmri na htem mẽ kutã amnhĩ to htỳx o pa nê mẽ umaj wa ixkaga hkêt nê. Na htem ã amnhĩ nhĩpêx anê nê mẽ kêp ixkra hã amnhĩ to amnhĩrĩt mex nê. Nà koja mẽ nhỹrmã wa ixri mex kumrêx nê htĩr tũm nê pa ho pa.

Anhỹr o hamaxpêr. <sup>6</sup> Nê mẽ kot Kris ã mẽ anhĩpêx punuj xwỳnhjaja koja Tīrtūm nhỹrmã mẽ atã mẽ homnuj tỳx nê nhũm mẽ amnhĩ xà htỳx kamã hamak rãhã ho pa. ãm hãmri koja ã mẽ atã mẽ hipêx anê. <sup>7-10</sup> Koja Pahihti Jejusja nhỹrmã man akupỹn pika hwỳr hirã htỳx kãm wrỳ nhũm Tīrtūm kapêr o mẽ wrỳk xwỳnh xihtỳx xwỳnhjaja man hkôt wrỳ. Koja mẽ wrỳ hãmri nê mẽ kot

amnhĩ tomnuj xwỳnhjê homnuj tỳx kumrêx. Jao ma mẽ kot amnhĩ xà htỳx kamã hamak tũm xàta wỳr mẽ rēnh pa nhũm mẽ kamã htĩr tũm nē amnhĩ xà htỳx kamã hamak rāhā ho pa ho pa. Koja ā Pahihtija amnhĩ nē mẽ kot hkôt amnhĩ xunhwỳr kêt xwỳnhjê rēnh anē nhũm mẽ pahkĩnhã Tĩrtũm mẽ Krata wa kuri mex nē pa hkêt nē. Nē mẽ pahkĩnh ā wa mex o wa mex nē wa hihtỳx o wa hihtỳx ā wa omunh kêt nē. Koja Pahihti Jejus nhỹrmã akupỹn wrỳ nē ā mẽ panē mẽ hipêx anē. Koja wrỳ pu mẽ amnhĩ kaxyw hkôt pajamaxpêr xwỳnhjaja amnhĩ wỳr omu nē pahkĩnh nē. Hāmri nē amnhĩ nhĩ nyw ā amnhĩ pumu nē kām:

—Hêxta waa nē. Amex o amex Pahihti. Na ka pre mẽ inhnē ty hāmri nē mẽ inhmã mẽ inhĩ nyw gō. Kot paj mẽ Tĩrtũm mẽ war ari inhmex kumrêx nē ixtĩr tũm nē ixpa ho ixpa. Ām hāmri na ka ā mẽ ixto mex anē. Nà amex kumrêx o amex kumrêx Pahihti. Anē.

Ā kot puj mẽ pahpê hkwỳjaja amnhĩ tã kām mex o mex ā harēnh anē. Ra mẽ ate mẽ ixkapêr mar nē hkôt amnhĩ xunhwỳr jakamã kot kaj mẽ ixpyrà nē ā kām mex o mex ā harēnh anē.

*Pawre kot Tesarōn nhõ xwỳnhjê ho Tĩrtũm wỳr ā harēnh*

<sup>11-12</sup> Nē na pa htem mẽ ato Tĩrtũm wỳr rāhā ho ixpa nē kām:

—Pa Tĩrtũm? E Tesarōn kām akrajaja na pa mẽ ho awỳ. Na ka hte Akra Pahihti Jejus Kris mẽ wa mẽ ho mex rax o apa. Jao amnhĩm mẽ arē nhũm mẽ ra kām amnhĩ to mex prām nē. Na htem amnhĩ kaxyw Jejus mã hamaxpêr rāhā pē mẽmoj to axpēn kutã nojarêt o pa. Jakamã kwa tanhmã mẽ hkrã

hto kê mẽ akôt ã amnhĩ nhĩpêx anhỹr rãhã ho pa. Kêr ka mẽ kot akôt amnhĩ nhĩpêx o pa hã mẽ omu nẽ akĩnh nẽ mẽ kãm mẽ mex ã mẽ harẽ. Nhũm mẽ ate tanhmã mẽ ho mex to hã amnhĩ tã apumu hãmri nẽ mẽ amnhĩ pyrã nẽ amã amex o amex ã ajarẽnh rãhã ho pa. Anẽ.

## 2

*Kot amnhĩ tomnuj tỳx kumrêx xwỳnh maati jarẽnh*

*Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18*

<sup>1</sup> Nẽ koja nhỹrmã mẽ panhõ Pahihti Jejus Kris akupỹn wrỳ pu mẽ ma kutã api nẽ kakrã kamã hkaxpa. Jakamã kwa Jejus kôt ixkwỳjaja. <sup>2</sup> Koja mẽhõ mẽ awỳr mỗ nẽ mẽ amã Jejus ra akupỹn wrỳk ã harẽnh japêr. Rỳ tanhmã mẽ amã Jejus hpôx xà hã arĩgro jarẽnh o hêx to nẽ mẽ amã:

—Kwa na ra Jejus akupỹn nojarêt. Koja tokyx akupỹn mẽ pahwỳr wrỳ. Semãn ja kamã rỳ ko. Apu hõ hã koja apu wrỳ rỳ ko.

Anhỹr o harẽ. Nẽ Tĩrtũm Karõ nhỹ hã ã kot mẽ amã harẽnh anhỹr ã amnhĩ jarẽ rỳ nhãm mẽhõ kot ã kãm harẽnh anhỹr ã harẽ. Rỳ pa ixte harẽnh nẽ hã kagà hã ijarẽ. Nom kwa kêr ka mẽ kapêr ma nẽ ãm ama nẽ hkôt ajamaxpêr kêt nẽ. Rỳ ama nẽ tee ri amnhĩ kukamã ajamaxpêr kêt nẽ. Koja mẽhõ ã mẽ amã Jejus tokyx wrỳk ã harẽnh anẽ nẽ ãm amnhĩ krã hkôt ã harẽnh anhỹr o hêx. Nom Tĩrtũm Karõ nhỹ hã rỳ pa inhỹ hã rỳ nhãm Kris kôt mẽ panhiõ nhỹ hã ã harẽnh anhỹr kêt nẽ. <sup>3-4</sup> Jakamã kêr ka mẽ ãm mẽ kot harẽnh o hêxja ma nẽ hkôt ajamaxpêr kêt nẽ. Kormã Pahihti Jejusja akupỹn

nojarêrê kêt. E kot paj ixprĩ hã mẽ amã ja jarẽ ka mẽ inhma. Nà kormã Pahihti akupÿn nojarêrê kêt ri koja mẽ ohtô rax kumrêx nẽ Tĩrtũm kutã amnhĩ xunhwÿ nẽ kãm hkurê ho pa. Nẽ amnhĩ tomnuj tÿx o pa. Hãmri nhũm ra kot amnhĩ tomnuj tÿx kumrêx xwÿnh maatija amnhĩ to amnhĩrĩt. Nom na pre ra Tĩrtũm tanhmã kot hipêx to hkukamã hã amnhĩ jarẽ. Koja xep gaa nẽ ma mẽ kot amnhĩ xà htÿx kamã hamak tũm xàta wÿr kumẽ nhũm kamã amnhĩ xà htÿx kamã hamak o pa rãhã nẽ pa ho pa.

Tã nom kormã Pahihtija akupÿn wrÿk nẽ ma hwÿr mẽnh kêt ri koja mẽ piitã omu nẽ kêp Mẽhpãm maati pixi hã harênh kaxyw mẽ kêp mẽ õ sãnti piitã hkrakrak pa. Nẽ mẽ kot mẽmo karõ ho amnhĩ pãm ã harênh xwÿnhja nhũm piitã hkrakrak pa. Hãmri nẽ axtem nẽ Tĩrtũm mã amnhĩ jarênh xà hã ixkre jatur xà kamã hitom wÿr axà nẽ kamã nhÿ nẽ hêx rom mẽ piitã mẽ kãm kêp Tĩrtũm ã amnhĩ to hêx nẽ mẽ kãm:

—E mẽ amnẽ ixpumu. Ixpê mẽ anhõ Tĩrtũm na pa. Pa kot kaj mẽ inhmã inhmex o inhmex ã ijarẽ. No kêr ka mẽ anhõ sãnti ho apãm o apa hkêt nẽ. Kwarĩ ho kwarĩ. ãm paxipix ixpê Mẽapãm maati nẽ paxipix ixpê mẽ anhõ Tĩrtũm.

Anhÿr o amnhĩ to hêx. <sup>5</sup> Na pa pre arĩ mẽ akõt ixpa ri ã mẽ amã harênh anẽ. Mãn arĩ mẽ ate ja hã anohtÿx rÿ ko. <sup>6</sup> Nom kormã ã kot amnhĩ nhĩpêx anhÿr xà hã arĩgrota kormã kator kêt. Mẽhõ kormã kot kêp àmnàr jakamã nhũm kormã kator kêt nẽ. Ra mẽ ate kêp àmnàr xwÿnhja jarênh mar. Tã koja hpôx xà hã arĩgro kato nhũm kêp àmnàr xwÿnhhta kãm pry kaprã nhũm rĩ kormã mõi. <sup>7</sup> Nom na hte ra hpimxur pê Tĩrtũm nê mẽ piitã mẽ hkurê ho pa.

Mē kot Tīrtūm kōt amnhī xunhwȳr pymaj tanhmā nē mē ho ho pa. Nom kormā kēp àmnār xwȳnhja kēp àmnār jakamā nhūm hte mē noo mā tanhmā mē ho hkēt nē. Tā koja Tīrtūm nhȳrmā kēp àmnār xwȳnhja mā anē nhūm kuma nē kām ure nhūm rī kormā amnhī to amnhīrīt nē mē piitā mē noo mā mō nē Tīrtūm nē tanhmā mē kām hēx to ho pa. <sup>8-12</sup> Koja kato nē Satanasti mē wa mē piitā tanhmā mē nokupyr to ho ri mē hkōt pa. Nē hēx rom mē kām aa mē kot mēmoj pumunh kēt kwȳ ho anhȳr o ri pa. Koja wa hēx rom te Tīrtūm kot amnhī nhīpēx pyrāk o ā amnhī nhīpēx anē. Hāmri nhūm mē kot Jejus kōt amnhī xunhwȳr kēt xwȳnhjaja ja hā wa omu nē wa hkōt hamaxpēr kurē kumrēx. Nē ām hāmri wa kapēr ā wa hkamnhīx. Kop apu ra mē kot Tīrtūm kapēr mar nē hkōt amnhī xunhwȳr ronhȳx ra Tīrtūm amnhī tā mē omu nē mē ho hkra. Nom koja mē kām kapēr mar prām kēt nē. Ām wa kot amnhī to hēx o wa pa xwȳnhhta kōt pix mā koja mē kām amnhī nhīpēx prām.

Ja mȳrapē koja Tīrtūm tee ri ja hā mē omu hāmri nē mē nē wa kot amnhī tomnuj tȳx xwȳnhhta wa omunh kēt nhūm wa tanhmā mē kām amnhī nhīpēx to nhūm mē wa omu nē wa hkōt hamaxpēr kurē kumrēx. Hāmri nē wa gryk ā Tīrtūm kaga jakamā nhūm nhȳrmā mē kot amnhī xā htȳx kamā hamak tūm xāja wȳr mē rēnh pa.

Koja Satanasti mē kot amnhī tomnuj tȳx kumrēx xwȳnh maatita ā hēx rom tanhmā mē no kupyr to anhȳr o pa rāhā nhūm Pahīti Jejusja hirā rax kām akupȳn mē pahwȳr wrȳ. Hāmri nē kot amnhī tomnuj tȳx kumrēx xwȳnh maatita ā amȳnē nhūm mē kām hpīr kurē kumrēx nhūm hapēx. Koja ā

amnhĩ nhĩpêx anê.

*Tĩrtũm kot tanhmã mẽ pahto mex to hã harẽnh  
Rõmãn 8.28-30; Wam Tesarõn 2.13, 5.23-24*

<sup>13</sup> Nê amnepêm kormã mẽmoj kêt ri na pre Tĩrtũm amnhĩm mẽ arê. Mẽ ate kapêr mar nê hkõt amnhĩ xunhwỳr nhũm kot mẽ ato hkra kaxyw mẽ arê. Kãm mẽ ajapêê. Na pre mẽ awỳr amnhĩ Karõ rẽ nhũm mẽ akarõ mã agjê nê tanhmã mẽ ajamaxpêr to ka mẽ ỹ hã tãm amnhĩ nhĩpêx rãhã ho ri apa. Na pa htem ja hã mẽ amã ijamaxpêr nê mẽ anhy hã ixkĩnh kãm Tĩrtũm mã mẽ ajarẽnh o ri ixpa. <sup>14</sup> Na pre mẽ awỳr mẽ ixrê. Mẽ ixte mẽ awỳr ixpa nê mẽ amã tanhmã Jejus kot mẽ panê amnhĩ nhĩpêx to hã harẽnh o ixpa kaxyw. Mẽ ate mẽ inhmar nê Jejus kõt amnhĩ xunhwỳr nhũm Tĩrtũm kot Pahihti Jejus Kris o mex pyrã nê tanhmã mẽ ato mex to kaxyw. <sup>15</sup> Jakamã kwa kêr ka mẽ ra mẽ ixte wam mẽ awỳr kagã mẽnhta kamã harẽ nê mar tỳx nê. Nê mẽ akõt mẽ ixpa ri tanhmã mẽ ixte mẽ ajahkre htoja mã ajamaxpêr mex nê hã ano htỳx nê hkõt amnhĩ nhĩpêx rãhã ho ri apa. Jao Jejus kõt amnhĩ nhĩpêx mex o ri apa Kris kõt ixkwỳjaja.

<sup>16</sup> Mẽpanhĩpêêxà maati mẽ Pahihti Jejus Kris wa kãm mẽ pajapê htỳx kumrêx. Na hte wa tanhmã mẽ pajamaxpêr o hihtỳx to ho pa pu mẽ wa ỹ hã tãm pajamaxpêr o ri papa. Nê wa ỹ hã nhỹrmã wa kuri pamex nê pahtũr tũm nê papa hkukamã pajamaxpêr kaprỳ ho papa hkêt nê. <sup>17</sup> Na pa htem mẽ ato wa hwỳr o ixpa nê wa kãm:

—Pa Tĩrtũm mẽ Jejus wa? Kwa kêr ka wa tanhmã Tesarõn kamã akrajê mã mẽ hamaxpêr o hihtỳx to kê mẽ war anhy hã tãm amnhĩ nhĩpêx nê

tãm hamaxpër. Jao kapër mex rãhã nẽ pa ho pa. Anẽ.

### 3

*Tanhmã mẽ pahte axpën to Tĩrtũm wỳr to hã kot mẽ pamã karõ*

*Korosẽ 4.2-4*

<sup>1</sup> Nẽ kwa Kris kõt mẽ ixtõ nẽ ixtõxjaja. Kêr ka mẽ amnhĩ xwar mẽ ixto Tĩrtũm wỳr rãhã ho ri apa. Mẽ ixte krĩ piitã hkõt mẽ kãm Jejus jarẽnh o ri mẽ hkõt ixpa nhũm mẽ kot mẽ inhmar nẽ amnhĩ kaxyw Jejus kõt hamaxpër kaxyw. Jao mẽ apyrà nẽ hkõt amnhĩ nhĩpêx mex o pa kaxyw. <sup>2</sup> Nom koja mẽ piitã ã amnhĩ nhĩpêx anhỳr kêt nẽ. Mẽ hkwỳjaja kãm Jejus jarẽnh mar prãm kêt jakamã kwa mẽ ixto Tĩrtũm wỳ kê mẽ inhnê mẽ omunh mex nẽ nhũm mẽ Jejus ã tanhmã mẽ ixto hkêt nẽ.

<sup>3</sup> Nẽ koja Pahihti tanhmã mẽ akrã hto ka mẽ ajamaxpër mex nẽ ỹ hã hkõt amnhĩ xunhwỳr tỳx o ri apa. Jakamã nhũm Satanasti mẽ ate amnhĩ tomnuj hprãm xàj tee ri tanhmã mẽ anhĩpêx to kaprỳ nhũm Pahihti mẽ anê omunh mex nẽ. Ra kot mẽ atã amnhĩ jarẽnh xà hkõt. <sup>4</sup> Koja ã mẽ anê hipêx anê ka mẽ ỹ hã tanhmã mẽ ixte mẽmoj tã mẽ amã karõ xà hkõt amnhĩ nhĩpêx mex o ri apa. <sup>5</sup> Tã kê Pahihti tanhmã mẽ akrã hto ka mẽ Tĩrtũm pyrà nẽ mẽ piitã mẽ kamã axukaprĩ ho ri apa. Nẽ Pahihti Kris pyrà nẽ mẽmoj punuj kutã amnhĩ to htỳx nẽ. Jao hkõt amnhĩ nhĩpêx mex rãhã ho ri apa.

*Mẽ kãm kaga xwỳnhjê jarẽnh*

*Wam Korõt 4.12; Epes 4.28; Wam Tesarõn 4.9-12*



<sup>6</sup> E kot paj hpānhā Kris kôt mẽ pahkwỳ kām kaga xwỳnhjê jarē ka mẽ inhma. Pahihti Jejus nhỹ hā kot paj mẽ amā tanhmā mẽ harēnh to. Nà koja mẽ akwỳjaja kām kaga nē amnhīm mẽmoj tā àpēnh kêt japêr. Nē mẽ ixte mẽ axàpēnh mex o apa hā mẽ amā karōja kuhpa hā amnhīm mẽmoj tā àpēnh kêt japêr. Koja mẽ ã amnhĩ nhĩpêx anē ka mẽ ja hā mẽ omu hāmri nē mẽ hkôt ri apa hkêt nē. <sup>7-8</sup> Xà mẽ pajaja na pa prem ma mẽ awỳr mō nē mẽ akôt inhmā kaga nē mẽmoj tā ixàpēnh kêt nē ri ixpa? Nà na pa prem mẽ apa kukwak ri ixàpkur pymaj ixàpēnh rũnh nē amnhĩ pa pix kukwak ri ixàpkur o ri ixpa. Na ka prem mẽ inhmā mẽmo mẽ apkur xà ho mra pa prem amarĩ amnhīm hamỳnh nē hkur kêt nē. Na pa prem hpānhā mẽ amā amnhĩre nē kormā kuku. Tā kêt ka mẽ ã amnhĩ nhĩpêx anhỹr o ri axpēn kôt apa nē amnhĩ pa pix kukwak ri apku. Nē mẽ amā kaga hā nhām akwỳjê hpa kukwak ri axàpkur o ri apa kêt nē. <sup>9</sup> Na pa prem amnhĩ pa pix kukwak ri ixàpkur o ri mẽ akôt ixpa. Mē ate ja hā mẽ ixpumunh nē mẽ ixpyrà nē ã amnhĩ nhĩpêx anhỹr kaxyw. Nom mẽ ixte Jejus mã tanhmā mẽ ajahkre hto nhũm mẽ ate mẽ inhmar nē hpānhā mẽ inhmā mẽ ixàpkur xà nhōrja Jejus mã tanhmā kute hkêt tā pa prem ã amnhĩ nhĩpêx anhỹr kêt nē. Mē ate ja hā mẽ ixpumunh nē mẽ ixpyrà nē ã amnhĩ nhĩpêx anhỹr kaxyw na pa prem amnhĩ pa pix kukwak ri ixàpkur o ri mẽ akôt ixpa. <sup>10</sup> Na pa prem mẽ amā ja hā karō ho:

—Koja mẽhō kām kaga nē àpēnh kêt nē ka mẽ ja hā omu nē kām ò hkêt nē. Kwār māmri apkur kêt nē kām prām nē ri pa nē amnhĩ pumu. Anē.

11 Tã xep ra mẽ akwỳjaja ã amnhĩ nhĩpêx anê nê kãm kaga nê àpênh kêt nê amarĩ ri pa. Nê xep htỳx ri axpên jakwa kamã nhãm mẽ hixi ho rêr o ri pa. 12 Kwa mẽ inhma Jejus kôt ixkwỳjaja. Kot paj Pahihti Jejus nhỹ hã mẽ amã mẽ kot ã amnhĩ nhĩpêx xwỳnhjê jarê ka mẽ inhma nê mẽ inhmar tỳx nê. Kêr ka mẽ kãm kaga xwỳnhjê mã anê kê mẽ jam ure nê hpãnhã àpênh mex o pa. Jao mẽ apyrà nê amnhĩ pa kukwak ri apkur o pa. Kêr ka mẽ ã mẽ kãm ixkapêr jarênh anê.

13 Nê kwa kêr ka mẽ axpên to mex o apata kaga hkêt nê.

14 E na pa mẽ ã Tirtũm nhỹ hã mẽmoj tã mẽ amã karõ nê hã kagà anê. Tã koja mēhõ kamã harê nê kuma nê ãm kuma nê hkôt amnhĩ nhĩpêx kêt ka mẽ ja hã omu nê hkôt ri apa hkêt nê. Tokyx kot ja hã amnhĩ pumunh nê amnhĩ tã hpijaàm kaxyw. 15 Nom arĩ Kris kôt kêp mẽ akwỳ jakamã kêr ka mẽ arĩ kêp mẽ atõ rỳ atõx ã tãm hipêx nê kãm akapêr mex o ri apa. Nom te ho kêp mẽ akwỳ hkêt pyràk o kãm akapêr kêt nê.

*Tanhmã Pawre kot mẽ ho Jejus wỳr to hã harênh*

16-18 Nê na pa hte mẽ ato Pahihti Jejus wỳr rãhã ho ixpa. Kot mẽ pamã mẽ pajamakêtkati xà nhõr jakamã na pa htem mẽ ato kuwỳ nê kãm:

—Pa Pahihti? Kwa kêr ka Tesarõn kamã akwỳjê pumu nê mẽmoj to mẽ kutã anojarêr rãhã ho ri mẽ hkôt apa. Kê mẽ hamakêtkati nê àmnhĩx pa ho pa. Anê.

Tã ãm ja pix. Ixpê Pawre na pa kagà jatur xà kamã inhĩhkra ho amnhĩ nhĩxi nhĩpêx. Na hte kagà nhĩpêx xwỳnh inhmã ixkapêr ã kagà. Nê hã kagà

hpa pa hpãnhã hatur xà kamã pam inhĩxi nhĩpêx.  
Tã na hapêx.

**Tĩrtũm kapēr ã kagà nyw**  
**New Testament in Apinayé (BR:apn:Apinayé)**

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

**Copyright Information**

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Apinayé

**© 1999, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 11 Nov 2022 from source files  
dated 29 Jan 2022

383a4e22-34cd-505f-9cc2-2f9921e7aa9f